

Investicije, radna mjesta i viši životni standard zavise od normalne politike



Podsticanje investicija, stvaranje novih radnih mjesta i podizanje životnog standarda u Bosni i Hercegovini zavise od toga da li će se lideri u ovoj zemlji udaljiti od otrovne retorike koju su ispoljavali u nedavnoj prošlosti i vratiti se normalnoj politici, rekao je danas prvi zamjenik visokog predstavnika Raffi Gregorian na skupu privrednika održanom u Sarajevu.

«Dok god parlamenti ne budu u stanju da usvoje i implementiraju reformski program, koji je već pripremljen, BiH neće biti u mogućnosti da privuče i zadrži investicije koje su potrebne za stvaranje novih radnih mjesta i izvlačenje ove zemlje iz siromaštva», rekao je Raffi Gregorian na sastanku održanom u Vanjsko-trgovinskoj komori BiH. «To se svodi na činjenicu da je ova zemlja siromašna upravo zbog političkog ćorsokaka u koji je zapala reforma policije i dvije ili tri druge reforme. Odsustvo normalne politike odvraća investicije, uništava radna mjesta, spriječava trgovinu i održava životni standard niskim».

Prvi zamjenik visokog predstavnika je rekao da «mnogi političari gaje pogrešno uvjerenje da se ekonomske reforme čekati dok se ne riješe druga pitanja», i upozorio da se «ne može dopustiti da se trenutna kriza, koja ide na ruku razvoju siromaštva i nezaposlenosti, nastavi u nedogled. S njom se mora uhvatiti u koštac i to odmah». On je pozvao poslovnu zajednicu u BiH da lobira kod lidera ove zemlje da se fokusiraju na hitna ekonomska pitanja.

Od ekonomskih prioriteta, Raffi Gregorian je istakao

konsolidaciju jedinstvenog ekonomskog prostora, unapređenje fiskalne koordinacije uspostavljanjem Državnog fiskalnog vijeća; osnivanje Ekonomskog i socijalnog vijeća BiH; modernizaciju bankarskog nadzora i zakona u oblasti komercijalnog poslovanja; i racionalizacijom plaćanja uposlenika u javnom sektoru.

«Sav pripremni posao po ovim pitanjima je već urađen, ali sve je odloženo jer političari žele da održe status quo što je moguće duže», rekao je Gregorian.

Prvi zamjenik visokog predstavnika je zaključio obraćanje navodeći da «moramo načiniti pomake po pitanju policijske reforme i ustavne reforme i drugih u suštini političkih pitanja – ali ne možemo jednostavno pustiti ljude da budu siromašni dok mi to ne uradimo».

Puni [tekst obraćanja](#) prvog zamjenika visokog predstavnika dostupan je na adresi www.ohr.int.